

四庫全書

集部

欽定四庫全書

弇州續稿卷十六

明 王世貞 撰

詩部

七言律

九月閉關謝筆硯而千里故人訊問不絕又多以  
詩及者遂成此二律志苦且代荅

小徑衡門鳥雀餘祇因才盡愛閒居諸緣暫息交猶在

一病雖輕懶未除玉案有無知莫較銀鉤早晚竟難虛  
于今却羨桓司馬博得空函省報書

其二

不盡秋風至羽翰報書猶可報詩難半生失計甘鷄口  
此日冥心任鼠肝柿葉懶題空自積梅花從折負它寒  
於今却笑陶都水才鬼誰能具眼看

齋室初成有勸多栽花竹者走筆示之

一室緣溪斷俗塵翛然吾自愛吾真澆花怕結春時業

種竹防驚夢裏神  
梧葉到秋無那病  
芭蕉過暑不堪貧  
何如且放空庭在  
月色風光好近人

夜聽印師禮誦走筆偶成

街鼓初停香篆寒  
唄聲那為雨聲聞  
彌陀界遠疑城近  
慈氏宮深外院寬  
正念可爭無念好  
非心還較即心難  
道人別有安身處  
未必清晨叩懶殘

送仲氏敬美視關中學政時皈心道門茲行染指而已

新裁絳帳擁朱輪沃野天開萬象春  
它日扶風多弟子  
早時函谷辨真人  
梁丘代是能傳易  
賈誼年來不過秦  
莫訝文無將贈別  
祇今猶作自由身

其二

念爾長誇太華尊  
褰帷秋色許重論  
可猶無恙金天掌  
應否居然玉女盆  
紫邏春添新句色  
青柯雲護舊題痕  
漫道濟南詩紀絕  
至今猶自閔真源

其三

閱罷晴原蟻戰酣還憑綵筆恣游探沿陂騎吹翻春漲  
入嶽星河挂曉驂間有壯心憐渭北定無佳處勝終南  
欲知西笈緣何意來與維摩共一龕

其四

別酒雙壺且細傾中年兄弟不關情何必諸生推北斗  
那須故帑覓西京雲開白嶽崢嶸態雪淨黃河黯淡聲  
縱有奚囊都放却逢人但可話無生

寄李本寧提學索其秦中文字

關西衆說楊夫子

謂應寧也

供奉吾憐李翰林

謂本寧也

即使人

才饒棧樸可無詞賦慰蕭森秦風雅有同仇好郢雪其  
如寡和音老去閉門無一字許公方外別論心

寄陝西右方伯徐公公近以吾郡兵憲遷

別筵霜色惠文冠遺愛偏留淚眼看今日棠陰歸右伯  
古時薇省在長安傳來素翮隨陽易寫就銀鈎度遠難  
珍重兒童一致語時時竹馬大河干

空山首座托鉢叅方因調其師館

緣師棒底少知音一鉢飄然辭故林是處可登三昧地  
何須忽起四摩心離山梅子從生熟採水菜萸自淺深  
歸到浴時須遣却佛堂牢閉不容針

辛巳元日試筆

一室歸來類僦居不欣添歲不愁除庭空爆竹如相借  
戶小屠蘇頓有餘少為含飴淹孺子依然抱影愛寒廬  
新年處處交堪絕祇許梅花未盡疎

華幼園以古隸見貽賦此報謝仍乞書國風



鳥翻山頭王次仲鴻都門下蔡中郎似分晉季鵝池墨  
流作梁清練水香柿葉過霜紅滿地芭蕉含雨碧堆牀  
二南須為縱橫寫老去風人有面牆

甫爾逍遙偶得陸司空與繩數行坐客因舉吳門  
詩語一笑賦此

數弓甌脫一蝸廬老去生涯自有餘但飽何須香積飯  
得閒能厭惠施書師教忍辱波羅蜜代有同生蔑戾車  
却是山僧多伎倆此身聾聵不妨渠

題宗良王孫摩尼菴

君家齋頭十九首一首一顆珠光流平陵頗梨吐五色  
欲與舍利俱千秋驪龍有頷那可採罔象無心翻見投  
燭火自來難鬪日豐城雙劍黯然愁

題匡南王孫爽臺

蘭臺高詠杳難攀滕閣鳴鑾迥不還忽有露莖超象外  
能令天籟滿人間披襟快自君王腋酌斗清廻帝子顏  
無那阿猷稱盡興憑誰拄笏看西山

同年彭比部輅貽游仙近體見懷漫成一律荅之  
神武門頭厭世塵挂冠天地許沈淪彭錢久矣君前代  
子晉那應我後身白石兩堪貧歲計碧雲孤憶賞心人  
縣知未賈扁舟興小有桃花可問津

送憲副王公家馭督視河南學政先是長公以春  
秋魁天下而公繼之

聖朝多士滿東周况爾工師極樸收萬古圖書更河洛  
八方文軌自中州洪都石佚還堪訪虎觀經殘可再讐

倘向青囊探秘策第云南史有春秋

閩中陳子韶憲使以二詩及書附賈舶見寄聊爾

次荅

萬里橋東賈客航曾携明月到吳閭清猿響挾三巴俊  
赤鯉心紆九派長終古墳簾還並協此生旗鼓不相當  
夫君自有夔州調刺史能無治草堂

其二

射洪零落有家聲中散傀儡無世情書到絕交堪自老

詩題感遇不須名逃禪別愛聲聞酒任俠能爭竹素衡  
今日一編天外至老夫差不負生平

宗人汝康都運端陽舉孫乞詩為贈

淮水湯湯無盡期琅玕又見吐孫枝石麒麟送在茲夕  
蠟鳳凰成應幾時眼中不置阿堵物膝下所以寧馨兒

蒲觴角黍最初會它日三千客是誰

孟嘗君以端陽日生故云

感事

白簡彷徨尋所之入山不深復何辭世人煮鶴寧一事

而我雕虫亦少時多聞比邱結未斷求名菩薩緣當遲  
怨生轉作善知識咀口識却波羅夷

吳母六十壽言母長齋三十年有子富而好道築  
淨樂宮七真堂於齊雲巘頂進士李元涇索句  
壽之

瑤島蟠挑熟太遲潘園諸種果無奇何如別創朱明館  
取劖新榮碧玉芝此日蘇耽唯母供它年盱眙有兒隨  
豪家水陸應何限不貸西山景向移

與敬美弟初出郭宿故墅

歲晏冥鴻憶序歸，秋深老櫓冒霜肥。  
居然北郭雙藍輦，對是南山一布衣。  
田父酒深能見狎，貴人交淺任相非。  
柴門促膝藜羹好，不為高陽舊侶稀。

其二

稚子猶能指二王，那知小令更清狂。  
頭顱不傍世人老，骨肉無如昆弟長。  
豈為池塘生好句，已勝風雨對匡牀。  
中宵錯訝埴簾奏，次第黃庭誦未央。

荅贈皇甫子循先生

小徑鋤來秋草繁  
新詩忽爾到柴荆  
誰能綵筆長無恙  
何處青雲不忌名  
失馬古猶傳塞父  
行金那可問莊生  
范少伯事莫疑禪客幽棲意  
總為人間百不平

孝豐吳稼塹故中丞峻伯子也弱冠而才以詩見  
投云還憑文舉通家刺去問留侯辟穀方生之  
從祖大叅君老於是中必有秘密相授僕何能  
為効因抒贈荅一章聊見情耳



衡門忽啓為吳均片語崢嶸意象新今日鳳毛真見汝  
向來龍腹定何人葛翁丹竈存應否王氏青箱久漸淪  
出世心期經世業少年才子自由身

有上人閉關居作此贈之

愛爾高居息衆緣沿階忍草任芊綿牀頭卧虎難為客  
頂上巢烏不計年天鼓自鳴朝梵後地肥爭發午齋前  
翻嫌慧遠生多事苦役僧雛種白蓮

贈馮咸甫先輩咸甫能文章其祖侍御公父京兆

君以忠孝著節云

汝向玄都禮赤文  
吾從彩筆覩青雲  
漁歌不惜齊南缺  
驄步終空冀北羣  
諫院世傳真御史  
陪京人頌大馮君  
亦知忠孝而家事  
可但詞場第一勲

大中丞陳公自楚南服貽詩見懷賦此為謝

曾向陳家識季方  
參差玉樹凜冰霜  
行臺對聳中丞栢

賜履重依右伯堂

公繼伯氏大司馬撫楚楚又公舊按部地也

萬里素書來

燕外十年丹禁接  
鵬行虛勞姓字占  
朝籍已賣殘軀事

藥王

同元馭學士及家弟敬美會李惟楨使君冰玉堂  
出沈啟南先生畫見示命作

陳榻懸來總為誰忝成三益共追隨已誇冰玉壺中客  
更愛丹青筆底詩畫戟清香吾郡事朱門蓬戶古心期  
興來指點虛無處便踏芒鞋去不疑

題贈安雅主人

安雅主人希長物道書數卷竹千竿不煩醫俗方為雅

無可徵心始較安薛氏雙輪歸計晚劉家三爵酒腸寬  
若逢恬淡齋頭客猶作人間白眼看

家元馭提學甫校士河南投劾徑歸詩以志羨

纔渡漳河興已闌北風吹岍惠文冠何人更許全三樂  
此地今看有二難忽憶淮南青桂色從它梁苑絳帷寒  
莫言小弟茅裘晚鬢髻雙顴似渥丹

壬午元日與敬美祝聖少飲即事

參差蘭玉映階新雙引金緋祝紫宸少選便尋居士服

爾時聊現宰官身三分栢酒誇婪尾千樹梅花鬪早春  
弟勸兄甯休惜醉眼前俱是太平人

張肖甫司馬特膺簡命督撫全浙賦此贈之得二

首

親捧兵符下九霄風旗獵獵馬蕭蕭度遼大將仍持節  
橫海諸軍不得驕見有副車迴塞柳可煩強弩射江潮  
經行總是甘棠地早晚追鋒趣入朝

其二

脫巾愁聽自錢塘推轂欣聞出建章六傳忽從周太尉  
舉軍爭隸郭汾陽溫言續挾三冬日肅令鋒迴九夏霜  
飛捷不妨清夜報宵衣天顧正南荒

留葉茂長小飲聞將有西南游歌以贈之

解道衡門絕世緣愛才猶獲葉生顛青鞋信足從它破  
白眼看人轉自憐詩好詫增緬素價酒狂思益布衣權  
西南岳牧誰黃射鸚鵡雖題莫浪傳

大中丞孫公貽書示按部期久不至聊爾奉訊

父老河干睇望頻  
孫郎江左欲行春  
單車立破千妖膽  
一疏能舒萬姓顰  
稍覺前茅旌色動  
爭傳細柳甲光新  
野夫亦傍花溪立  
為雨為雲忽未真

讀穆敬甫所選明詩七言律有感  
蓋時輩之作在焉  
又多猥及余云

十年龍卧大河湄  
磊塊時時一吐奇  
共許使齊能論樂  
何言返魯便刪詩  
搏秋片羽風斯下  
媚夜繁星月竝垂  
白雪祇今多並駕  
不須惆悵不同時

以近况報敬甫亦小有所規也

久自沈冥遠世情虛勞琬琰表西京須彌頂上無文字  
林慮山中有姓名咫尺蒲團天樣闊些微匣鏡月同明  
未論真得三漿味染指能令萬事輕

胡憲使歸自滇中年六十

三朝循吏贊昇平一疏歸來萬事輕隼懷尚沾滇楚淚  
漁舫先結嵒湖盟青山甲子從仍數丹穴鵷鷺有嗣名

他日胡威蒙召對定知能讓乃公清

時元瑞將  
上春官



賀大中丞晉臺秩撫蜀

璽書今旦出燕京  
吳蜀恩波去住平  
牛女星移益部邑  
岷峨雪作大江聲  
寧唯遺愛如何武  
遮莫前身是孔明

用韋事

開府西川多拜相  
即看紅燭引雙旌

得騏兒領解南都報書此寄勉

齋房寂寂篆煙微  
忽有泥金叩竹扉  
一日看花傾白下  
千秋奕葉振烏衣  
彈將流水方成是  
別後連城始悟稀  
最好鹿鳴歌宴罷  
莫教恬澹與心違

其二

鏡裏蛾眉歎不逢承恩今際易為容一毛吾自先慙鳳  
五彩而寧僅似龍阿閣紛驚初日擁鍾山瞥見慶雲從  
莫矜家世青箱業賸有餘忠報九重

送張侍御予告還蜀

南牀白簡一時傳忽荷君恩賜沐偏建業秋霜無避馬  
雲安春雪有啼鵲歸心已度千盤棧起色重呼萬里船  
負弩雖榮知不愛相如今是著書年

送傳吳縣入覲以善治民間而山甫子予輩謂其  
負仙骨精禪理因賦此為餞

吳門匹練貫三台為是朝天彩鷁開  
葉縣仙人飛舄去  
東陽大士應身來  
君王別對重雲殿  
元會曾沾萬歲杯  
莫笑深山諸老宿也騎竹馬候江隈

送徐少卿冊封魯諸王便道歸壽大父太師公八  
十還朝兼簡其弟元普中翰

即從東兗下東楊  
羔鴈紛紛簇錦堂  
家慶百觴師尚父

公餘一賦魯靈光  
孫枝玉樹堪誰並  
仙掌金莖待爾嘗  
欲識先朝真肺腑  
闔門符璽侍君王

其二

雲門喬木鬱相望  
誰似徐卿慶澤長  
兩世四為符節令  
三朝五錫太師章  
朱顏綠髮明郵傳  
玉冊金書出尚方  
寄與鳳池難弟道  
好裁新賦獻長楊

送毛豹孫天池寺檢藏寺為僧久據爭之力而後得之

知君逸思倦周旋愛結天池寺裏緣寺憶東亭初施日  
池誇康樂再開年唄聲時出歸雲外梵夾初收落月前  
即使頓翻三藏徧不如離欲近初禪

題春草馳情卷寄答孔炎宗侯

胎簪秀色滿果愚父子風流豈異時臨得宛陵離後帖  
張長史宛陵帖  
一曰春草帖  
裁將康樂夢迴詩王孫不斷蘼蕪恨天

馬長銜首霜悲若問吳臺眠起處一羣麋鹿眼迷離

子厚第三書孤憤之懷極矣男子要自有出世事

毋論浮榮即不朽亦第二義也賦此廣之

雙鴻不獨問加餐筆底縱橫意萬端總為難呼中散駕  
可能無恨遠游冠枋榆社日吾寧老桐栢春源爾自看  
記取緱山明月夜玉笙鸞背莫辭寒

其二

朱邸朱絃響競新少年都美出風塵從誇郢里傳孤調  
耻向南陽問貴人七子有文身似葉八公無藥鬢如銀  
懸知出世男兒事笑殺難陀應轉輪

壬午初冬忽傳明卿有非常耗者得書喜劇因成  
一律情見乎辭

矯首南雲眼劇穿銀鈎乍展獨欣然人驚罔象珠仍得  
我識隨侯月故圓久自千秋歸大雅何妨七日宴釣天  
病夫粗了區中事進爾同皈第四禪

沈太史請告歸嘉禾走筆問之

戰勝歸來定不臞可應腰帶沈郎如金陵水鑑掄才後  
樵李湖舫起色餘聞說尚方多請劔近來南史著何書

知公自有冷然馭倘逐春風過草廬

元日過敬美小酌試筆

獻歲家園倚杖過劇歡兒輩奈衰何  
寒貪棣萼連枝暖病怯屠蘇半戶多  
白屋千家同慘淡黃冠一老自婆娑  
長安日有維新詔不必春風到薜蘿

送余教授歸天台兼簡應在明

拂袖高歌歸去來春深採藥卧天台  
即探仙洞桃花色可似公門絳帳開  
滄海煙波寬釣艇赤城霞氣近樓臺



還聞舊社劉郎在好共胡麻飯一杯

仲氏力辭浙學之命得請志喜

一疏陳情抗帝顏辟蘿仍碧鐸仍斑但知洛下東西屋  
終作何家大小山澹圃築來隨願老驚帆收得到頭閒  
弟有收帆之夢諸生縱有春風思無那歸雲為掩關

其二

若為祛得古今愁金紫榮身脫便休世事清朝多稷契  
天容遜野有巢由從誇大隱官猶戀倘遇東林酒亦留

伯氏黃冠雖不惡總緣人棄覓滄洲

魯子澄談禪轉甚而自詫其詩工且時時露壯心

賦此

投杼當年似愛公絲綸却捲向隆中生來燕領誇飛將  
老去牛頭事懶融百鍊雄心猶未死五言新句傍誰工  
莫嫌行逕山人別僅曉人間色是空

周公瑕先生壽言

江左烏巾世所宗墨花飛灑勝游龍家家拂席延何點

處處磨碑待李邕止酒不煩壺作隱著書爭羨筆為農  
晚菰新韭周郎味倘許山人作歲供

輓康山人裕卿

結客翩翩滿二京雅聞然諾重康生歸來樂志粗欲就  
老去潛夫猶未成幸自故人收俠骨誰從遺草問詩名  
寡妻弱子能無恙知有當年范巨卿

謂王陽德  
大叅也

寄贈大名魏侍御

主聖臣身迫自輕嶢然霜色在臺評向時河北推三鳳

今日朝陽讓一鳴遷客幾曾仇絳灌相門誰不愛韋平  
母憐枳棘羈棲晚勸爾聊收循吏名

贈劉長洲應召入諫垣

喜見尚書尺一真驚聞父老擁徵輪中吳處處推循吏  
全魏年年晉直臣馴雉甘棠歌正起青蒲白馬事仍新  
杜陵野老迂愚甚但道臨危莫愛身

題大痴老人畫山大痴此畫甚佳而後有楊廉夫  
題一律險譚都不切事至末句云海上升龍須

有約鑊耶笛子許君聽尤可笑諸君毋不步其  
韻者余亦戲步之將使後人而復笑後人也

大痴老人時一醒幻出疊疊芙蓉屏客驚咫尺萬仞勢  
天割東南千古青擬將卜築探地肺便足指點稱山經  
鐵龍未曉畫中理縱作龍吟不可聽

寄題鄒孚如舍人讀書草堂

鄒君新卜漢江居帶草緣堦墨染渠雪滿梁園堪就賦  
天迴碣石易成書陽春里近高誰和大酉山連勝有餘

衰病轉憐奇字少不煩踪跡子雲廬

錢塘陳師太守以二詩書扇寄題弇山園索和及  
手書筆甚古云欲梓之集中勉抒近況以答

一卷殘編遣歲華數拳奇石割煙霞那知西子湖頭客  
翻憶東陵園內瓜名倦拋珠還罔象意長篝火伴毘邪  
憐君誤損銀鉤寄博得薑芽未可誇

肖甫元治浙師功成召拜御史大夫行左司馬事  
道過吳門輕舟入訪弇中賦此贈別得二章

虛堂跋燭且從容十載吳門憶景從  
脫贈祥刀猶似電  
佩來華劍已成龍  
三臺執法新推長  
八座論兵舊折衝  
醉語似狂君不厭  
莫因台鼎便中庸

其二

君王不愛徹侯章  
大將仍分副相牀  
攀臥萬人闐櫓李  
參差兩地滿甘棠  
家家戶戶祝煩巫  
史字字謳謠上太常  
今日表公文士用  
頗令毫翰有輝光

汪仲嘉見訪有贈

已自三星聚草堂桃花潭畔更汪郎時從禹跡探科斗

君好古間擬秦聲引鳳凰

君以詩見投

文筆好傳司馬法酒

杯毋學次公狂相思莫畏江鱗阻水到錢塘便一鄉

陳太常謫官不赴十五年矣精修梵行與世塵絕

聖主求舊一月三遷勉赴留省之命聊成二章

以抒鄙素

言公祠畔水曾流楓冷紅飛建業舟一出不教猿鶴怨  
千秋重覩鳳凰游清曹總是阿蘭若淨行依然老比丘



見說護持功業就靈山佛會未曾收

其二

羨爾幡然了宿因秣陵秋色引徵輪  
賜環今日無同輩請劍當年有直臣  
此去但修居士業何妨重現宰官身  
病夫伎倆消除盡莫向明時及隱淪

沈純甫丈歸自嶺南屢遷九列濡遲未上移舟訪  
余弇中有贈

入門左顧鵲生輝寧似仝期嶺外歸  
自有諫書明竹素

肯將詩句博牙緋  
鱸因佛骨能前徙  
鱸為鄉心且暫肥  
一月三遷恩不薄  
可能猶戀薜蘿衣

純甫丈與元馭兄弟及仲氏敬美善見訪投贈俱  
有四王之日既感且慙聊此答謝

江東閥閱僅相望  
二耦才名吾敢當  
久向蜀州輸五短  
祇如京兆數三王  
何山自顯人安在  
慧地初更姓亦忘  
况擬歲朝焚筆硯  
可餘新論報中郎

僕近有五子篇擬魏懋權似不欲以文士名也用

贈長兄韻答我因再成一章倚韻見志僕亦且  
謝筆硯矣

有重能令事事輕知君不愛汝南評鯢從六月稱長息  
鳥向千秋始善鳴高嶺通天翻更遠衡波到海自然平  
道人併杜蘇門口悔遣嵇康識姓名

唐人有畫葛稚川移居圖者與婦各騎一犛角牛  
前後五白羊從之一赤腳擔裝又一少女從之  
手携束書且行且讀婦所乘牛背大襍一嬰兒

在焉其用筆頗雅勁山谷老人書七言律于尾  
似不能悉稚川事故為補題一首

勾漏歸來里舍亡山中丹井未全荒騎將老子雙青犢  
叱得初平五白羊宅相嬰兒似南海徒行少婦學東方  
刀圭縱有難從乞祇要姑姑艾一囊

觀一上人將往五臺禮文殊出行卷索贈

一錫初開行脚緣五臺高擁佛螺煙聞師欲訪金剛窟  
誤却文殊鼻孔邊過耳便成獅子吼安心莫墮野狐禪

從遭寂老擲揄後不傍人間七百年

南昌龍沙輔國輓章

聖朝江介數親賢屈指俄成劔化年不雨西山愁自暝  
隕星南斗氣空懸淮王丹竈宛猶在子政青藜寒更燃

予壽公嘗以此二事為擬

眉壽似公何所恨祇應惆悵石函篇

公好仙術

取石函記中語以龍沙自號云

題馮南江廷尉水西臺

欲識先朝馮野王高臺宛宛水中央為憐游鳳金陵地

猶帶栖烏御史霜起傍北辰瞻北闕望依南斗憶南荒  
請看喬木連雲處不似蓬池多慨慷

再用廷尉之子京兆君韻西臺又曰馮臺

卜築初成萬象開高風不讓景夷臺九峯雲氣時時合  
三泖波光面面來共道將軍人似樹宛然仙尉市名梅  
瀾狂柱屹當年事感舊懷賢首重廻

梅字押最無味  
僅得此一押耳

閉關

虛自羣喧草大還不多青眼畏塵寰由他國士誰謀國

若箇山人肯往山長病醫方無勝嬾漸貧生計莫如慳  
地鑪櫨拙煨生芋風雨蕭蕭且閉關

邢子愿侍御枉駕弇園二章

星郎南代大家巡海國東停使者輪繡斧寧為暴公子  
朱顏妬殺尹夫人篝燈疏草三吳淚隱篋芸編萬古身  
怪得弇園霜色薄尊前笑語盡陽春

其二

一叟沾沾喜自論浣花全勝百花邨停驂衆訝桓君轡

羅雀吾驕翟尉門樹暝忽迴春雪照臺孤迥見法星尊  
即能傾蓋輸肝膽無那初筵黯別魂

復陪子愿侍御過家弟敬美澹圃作

皎然冰玉見風姿况有新篇鬬色絲不盡弇園仍澹圃  
為探周鼎復秦碑談溫草樹寒從破坐久星河莽下垂  
唯有隴梅尤氣色似聞先卜早春期

其二

三徑衡門有荷簑野情能不避雙呵使君文逼東西漢



處士山連大小何偷暖地棠殘紫在狎寒天竹亂紅多  
莫疑車騎邢侯簡為恐霜威惱辟蘿

餞李惟楨使君遷浙江行省叅政領金華諸郡

仙官去領金華部迂叟頻翻玉屈卮三載潤叨時雨足  
五更愁覩德星稀飛帆隱隱棠千樹別曲依依麥兩岐  
無那鄭公遷鎮後浣花花事與誰期


其二

離筵父老莫長嗟吳越春風共歲華久自幸叅元禮御

疇能不挽細侯車開簾幾道銅沙水擁閣千尋菡萏花  
若遇初平須借問此君兄弟勝王家

余以己巳正月渡江訪會家弟於天界寺雪阻五  
宿今年臘月寺僧訪余曇陽菴留宿雪復大作  
因成一律寄之

昔年五宿天界寺今日重逢天界僧  
傍看無髮勝有髮  
此事吾能汝不能聽講雨花還更  
否聞鐘乞食記誰曾  
雪鴻指爪何勞荅且共龐公坐一  
燈



弇州續稿卷十六

欽定四庫全書

集部

弇州續稿卷十八

詳校官編修<sub>臣</sub>潘庭筠

中書<sub>臣</sub>劉源溥覆勘

總校官進士<sub>臣</sub>楊懋珩

校對官檢討<sub>臣</sub>王鍾健

謄錄監生<sub>臣</sub>張賦京

欽定四庫全書

弇州續稿卷十七

明 王世貞 撰

詩部

七言律

答魏大侍御時自謫遷南考功

一龕燈火傍殘年  
畫省勞君記憶偏  
名去已無彌勒累  
病餘甘老辟支禪  
爭傳諫草千秋業  
未了曇花半偈緣

好去鳳皇臺上望攬輝爭似昔人賢

贈李公子

冰玉堂中夜色酣皎然瓊樹坐相叅毛當彩處知為鳳  
絲到青時雅勝藍幸自忝收文舉刺那能別共阿戎談  
朝來學士支牀語吾道于今忽已南

甲申元日試筆

暫施冠服候呼嵩爆竹聲殘續曉鐘天上元正開白虎  
山中初九愛潛龍數枝椒栢和玄醴一畝蓬蒿謝素封

五十八年猶未是于今化日始從容

偶成

匡牀眠坐儘優游興至三杯過即休  
小出便支邛竹杖輕寒旋進木棉裘  
爭春桃李差嫌富滴雨空階不起愁  
較得近來詩句拙肯容心力費雕搜

其二

城隅鹿共蓬蒿宅春首鶉懸薜荔衣  
鷄犬不妨名地肺鳬魚隨處有天機  
曾希玄嶽祠官選別署茅山道士歸

出處浮雲都散盡可煩追較向來非

將斷文字緣作此

奇人縱可敵揚雄才鬼那能勝葛洪仙字嚼完還作蠹  
古文雕盡僅名蟲迂謀欲寄千秋後夙業都收一寸中  
最好祖龍真解事談天非馬頓成空

其二

春來約畧保殘身第一先教筆硯塵不出幸逃歌鳳句  
空言羞博愛龍人冰絃斷盡琴心顯蘚匣埋深劍氣真



會得維摩法門意孤峰何處不嶙峋

壽行太僕卿徐明宇七十

惠文冠挂白雲深家傍仙源可易尋  
傲世松筠長借色及門桃李盡成陰  
笈藏玄女三符字書闡羲皇萬古心  
七十縱稀何足頌他年須獻武侯箴

吳明卿大叅挾方山人仲美王太學行父以三月  
三日訪我弇園與家弟敬美曹子念騏兒小集  
分韻得林字

闕

風流可重尋足音歡劇淚沾襟不教刺渚成歸易  
為感南皮舊俠深度曲過雲千樹響迴繞弄水百花陰  
蘭亭故是吾家楔名數依稀更竹林

明卿與諸君過澹圃分韻得窮字

無轄何須畏孟公家園不腆有春風晝長榆影傀儡後  
溪靜人聲杳靄中奏我朱絃吳楚合感君青眼弟兄同  
興來俗物難輕敗源隱桃花未怕窮

明卿諸君再過弇園分韻得園字

日日呼兒掃華門即看春夜為誰繁論心自古平原酒  
有句重過何氏園移病故人當不厭避賢詞客暫稱尊  
唯憐濟勝無多具報爾空梁落月魂

明卿走醵先司馬墓貞以病不克從僅家弟侍行

志痛志感

攏首愁雲結夜臺墓田松栢慟餘栽百年玄草侯芭在  
萬里生芻孺子來羈病轉深烏鳥痛獨棲誰和鵲鴒哀  
但懸吳劒寧論晚何事星文黯不開

贈鄒黃州彥吉遷閩學憲彥吉之先為宋忠公浩  
其外大王父則魏恭簡公嘗視兩省學政者也  
驪歌赤壁尚相聞絳帳閩天已似雲不為聖朝偏貴少  
幾人循吏復能文道鄉遺脉從看大宅相餘光久借分  
處處江山俱動色一詩先報武夷君

方仲美博學有文而時時使酒依吳明卿居武昌  
從訪弇中有贈

別我方千近十年武昌魚美足留連書從七略能窮討

字向三倉有秘傳倚醉漫誇文舉客長貧忍挾退之錢  
縱令相見無饒潤去後那能不可憐

王家馭提學春夏之際連得二丈夫子以詩賀之

再責開宴

紫氣充閭瑞不孤為誇英物重咏咏天門累送麒麟石  
海國雙輝老蚌珠同歲也堪名達适及秋爭指字之無  
但教湯餅頻頻會何必論功始見呼

與元馭宗伯家馭及吾弟敬美二學憲陪楊大宗

伯月夜沿流泊西墅作

婁子城頭生暮烟坐深爭愛月娟娟  
蘭橈信水知何處蠟屐穿林亦偶然  
但語襟期俱有素即談朝市不妨玄  
機忘已信眠鷗熟綬解那勞醉尉憐

州司不出  
候公故云

送殷無美赴夷陵守

十年清問滿公車今覩方州建隼旗  
東下江平知禹鑿西來土黑是秦餘  
渚宮人去烟俱冷巫峽才多雪不如  
俱道大夫饒賦咏莫因天遠廢雙魚

大中丞馬公昔建節渚宮余忝氣分之雅茲撫有  
江右貽書慰存賦得一律志謝兼簡公部人鄧

太史

棠陰故傍渚宮多槐色新從南浦過此日五溪懷馬援  
當年一疏忝常何魚檄遠結纏綿意錦段難為報按歌  
宇下豈無徐孺子可能廻駕訪烟蘿

送顧太史病起還朝

片帆無恙闔閭城起色江潮早暮平定有朝霞凌玉筍

可因秋月傍金莖箕裘別振傳家業臺閣無妨蓋代名  
況是著書繁露就君王日俟廣川生

挽尚爾王承李君

內史方欣省覲時那堪慶弔忽相隨迢遙漢苑金莖露  
零落淮南桂樹枝看毬鳳毛能不惜並埋犀麈轉成悲

祇應長吉文成後遣捧霓旌召太師

君卒後半歲而  
太師亦捐館

李本寧大叅自楚訪我弇中紀別二章

艤艚忽轉越來溪太史浮湘下會稽誤擬真人栖海上



久知夫子在關西看它氣色還金馬顧我形神似木鷄  
稍喜薊門游子到別筵能唱白銅鞮

其二

誰堪支策訪柴荆一笑高天青眼明八月江濤為起色

五絃春雪乍成聲

君時服除

雄飛豈復吾曹事狎主憑君異

日盟却笑少陵都不解李侯那肯似陰鏗

少玄瀑泉二將軍母七袞褒封太夫人壽言

魚軒容與誇王國鳳詔聯翩出帝州太母別封加紫綬

將軍新第枕丹丘稱觴珠履三千客  
遶膝斑衣十九侯  
共曉含飴今日樂不知九膽向時愁

少玄奉國蒙恩推攝國事詩以賀之

洪都朱邸鬱摩天同姓諸侯未乏賢  
帝欲紹封齊孝後人傳攝國魯侯年  
長沙不少迴旋袖子建何煩自試篇  
最好豫游鑾玉地可應歌舞但如前

為仲淹贈其猶子肇元

新都少年汪肇元結客不肯稱平原  
沾沾執鞭御元禮

宛宛解珎貽王孫累基少深伯父賞學詩晚得門人尊  
莫將片語為月旦水鏡于今吾已昏

經師朱教諭先生八十壽言

仍棲故壘學庚桑書帶沿堦薜荔牆老去朱顏猶自王  
少來青眼或能方西河舊憶經生業北面誰當弟子行  
偶為敲針一垂釣不將餘日向文王

有感

出處頻年尚屬人于今不出始由身留將頂相稱居士

洗却頭銜字道民一鍾隨身那諱死三食度口不緣貧  
寄聲無限同盟者苦海中間學問津

汪伯玉司馬同淹佳二仲徐孟孺胡元瑞過我弇  
園而張司馬肖甫亦至

清秋起色強登臺不為高軒護綠苔星斗自催占象動  
風雲羣擁卧龍來况逢開府前茅地各逞追鋒上駟才  
出處縱殊心事一狎人鷗鷺莫輕猜

送伯玉同二仲元瑞清洋將抵玉龍橋望玉山作

離筵太白肯留殘欲盡豪賢且細看青雀又分孤旆色

玉龍空並兩峰寒驕從塵尾爭名晚

仲淹被酒與元瑞爭名而開

老

向刀頭恐淚難

伯玉與予最老而最相知

何事不留三鳳住王家兄

弟少琅玕

乙酉元日試筆

黃鷄唱曉酉更真老興不逮兒曹新孤眠一千八百日  
尚作六尺尋常身坐頭却占最後盞厯尾數殘無復人  
旋呼藍輦入山去別向梅花探早春

人日得毛侍御秋中貴竹書有感却寄

當時繡斧出姑蘇壯思那隨別思徂秋鴈始為人日信  
夜郎方表使星孤輪埋足馬霜先後檄掃千盤瘴有無  
不為漁樵堪記憶祇應清夢入江湖

癸未十月成伯從孫詹錄偕弟進士寅季姪孟嘉  
過敬美澹圃看菊花作

九月黃花十月肥疇能澹圃鬪寒菲移庖酒自江州好  
挈弟人誇小令稀二阮不須論犢鼻諸王應是勝烏衣

憑誰請得歲華輪夜半猶歌緩緩歸

甲申中秋夕成伯寅叔孟嘉復携酒弇園楚人李  
惟楨來不疑輩在焉頗具歌吹之樂得一首

弇園寂寂已經年忽有新颺弄管絃楚客自能鸛鵒舞  
吳儂偏愛鷓鴣篇携來羣從蘭心美折後雙枝桂魄圓  
塵世明朝應詫說緱山此夜有羣仙

寄夏州張中丞

然明風績許誰攀西斷單于指掌間投筆欲乾蒲類海

如掾還濕賀蘭山囊無赤白烽長偃綬有銀黃肘不閒  
聞道秦天猶咫尺未須愁問玉門關

憲使西華王公七十乃弟暘谷公亦六十九矣子  
念乞言為壽

西華山頭西母過喜君花萼媚烟蘿從知嗽蔗流光美  
况復分柑樂事多門有鑑湖堪賀季室無天女勝維摩  
公居禪觀  
傍無勝侍  
塤簾別是千年曲不唱平原奈樂何

范侍御按越還枉駕草堂值予徙止弗獲修欵志



感并謝

官中一范早知名況復郵筒來往情却為青郊深草屬  
虛勞紫氣枉柴荆鴟夷去越從誇疾魚舍還吳且自輕  
見說飛章摧五鹿那能嶽嶽傲諸生

寄彭欽之太學

看君經笥腹便便入洛何妨彊仕年舊有華亭豪士賦  
新成蘭史辟雍篇橋門細雨巾從角帝里高山瑟漸絃  
師傳安昌應不乏阿誰虛席待彭宣

赫侍御按蜀見訊以所作金紫橋詩刻及吕仙翁  
贈詩見示有答

白簡丹心奉聖朝猶能清念及漁樵即看頰尾雙魚色  
至自驄蹄萬里橋夔子暮雲應獨裊蓬婆春雪為誰驕  
吕翁虛有邯鄲贈叱馭王尊豈憚遙

送徐孟孺游北雍且應秋試

南州孺子雅翩翩坐榻時煩府主懸璞玉自佳三泣楚  
囊金行盡一游燕寧因狗監文方貴纔及龍門客便賢

君久客元  
馭閣老  
衰病送君無可道依稀猶記鹿鳴年

李維楨使君自金華修訊且惠山資有謝

春來蘿薜媚深幽猿飲鴻棲何所求  
但得音書賢十部  
寧將筐篚累諸侯  
山驅白石堪修饋  
水釀清溪足破愁  
若使鄭公重  
仗鉞還從竹馬候江頭

觀奕者周生與朱茂才奕偶成一律贈周

娟清館前花事微  
客將棋局送斜暉  
聊成死處窺活趣  
不向生門發殺機  
敵手壘成俱渭水  
監軍馬蹶有淮淝

一枰未了與先盡餘響猶殘吾已歸

趙汝師宮洗領少司成以野服過我草堂言別作  
當時雙鳳嚮朝陽此日三鱣集講堂黃綺可緣宮傳重  
白衣時作野人裝旋分僧供茵陳暖小出村沽栢子香  
非是木禪都不薦慈悲一願未曾償

汝師語次多及時事民瘼慨然有感復成一首

春風融融吹客牀忽有霜色生干將感君方寸起鱗甲  
笑我七尺真皮囊燕中羅網致足畏吳下繭絲胡可當

藉令指日相司馬何似得雨烹弘羊

弇山堂庭中玉蘭及含桃二塢

玉蘭萬朶玉屈卮含桃亦自烟迷離祇愁紅紛墜瑤砌  
忽喜靺鞨黏青枝朝霞碾圓搖妓髻甘露結液和詩脾  
劉郎醉卧舍人橫齧妃女唇甘如飴

弇山堂後石甃芙蓉池

弇山堂北四綺樹落花盡落芙蓉池丙夜盈盈壁月照  
伏日習習香風吹衛軍開府誇上客秘監擘紙裁新詩

野夫但解碧筒飲九竅涼生當語誰

竹逕之右方小白蓮池

懶病難畊綿上田不因中聖始逃禪行穿王舍城中竹  
小得東林社裏蓮月色細分金瑣碎露香偏施玉嬋娟  
欲知雙屐鍾情處多在朝暉未吐前

少保戚公元敬解嶺南將印還萊海訪余婁上言

別得二七言近體

將星初傍女牛鄉與剔青燈秋夜長嶺海歸裝無蕙苙

薊門遺愛有甘棠從他貝錦時催織未必良弓便可藏  
別酒自溫膚自粟篋中霜色起干將

其二

婁江西接五湖濤別鷁穿雲望眼勞但使鷗夷心事足  
毋論麟閣姓名高安期自有仙人棗治子何煩大相桃  
若遇魯連東海上為言余久愛蓬蒿

送常章二廣文射策公車

鳴鹿諸生嚮祖筵碧霄鸞鳳劇聯翩四詩誰不推匡鼎

三絕俱堪嗣鄭虔今去連城雙白壁  
竭來寒雨一青氈  
懸知博士多高第不是留川即廣川

送蹇子上兵憲進中丞撫順天

獵獵朱旗鼓吹翻聊從父老一攀轅  
衮衣可更來南土  
鎖鑰今偏借北門日月自懸三輔近  
風雲長護七陵尊  
何當貌得髯公相把向麒麟閣上論

其二

初霰霏霏點旆旌  
餞君偏作薊門行  
單于馬攝前茅勁



中尉旗開細柳晴但是運籌推蹇叔寧因結襪禮王生  
摩娑倘認燕然石笑殺曾汙漢將名

太倉周大夫入覲大夫以治行高數被旌薦而催  
科不及數未得奏考

江左方州禮數崇一時巖邑盡輸公陽城任拙催科考  
尹鐸終高保障功別去單車裝似葉朝回五馬氣如虹  
老夫數沃醇醪飲今日顏衰敢望紅

送崑山劉令入覲

父老謳歌擁別筵誰能借冠不朝天  
清心白壁看同瑩  
治行黃金賜獨偏  
葉縣仙人鳧遠日  
中年茂宰雉馴年  
翻嫌劉寵生多事  
不遣行囊長一錢

遊金澤古寺

花宮一刹聳烟霏  
像教雖存法力微  
佛供可周饑鼠食  
僧雛時傍倦鴉歸  
尚書剝有棠陰榻  
丞相留將藻火衣  
却笑東亭癡捨宅  
如雲甲第許誰非

伯玉建精舍於肇林猶子肇元百步外構室署曰

東林賦而書之

精藍法護創何年仍許東山傍謝玄屋擬鴈門呼作市  
身依蓮社好逃禪斜陽易得西歸境新月遲窺乍上絃  
從此只應寬酒戒莫教陶令廢周旋

支簡亭學憲謝病歸問訊之

清秋五嶺倦炎蒸一疏天迴玉井冰合浦採還珠的歷  
鬱林裝借石峻嶒到時韓子能驅鱷歸後支公不養鷹  
消渴已蠲饒起色可無新賦頌中興

吾郡太守朱公治行為天下第一天官卿言之上  
超拜浙省大叅分理明越余老且病於其發也  
不獲從父老攀挽之後僅以一詩為贈

明堂大計中興年蚤有除書下潁川膏雨尚留吳地潤  
德星初傍越江懸政成神雀飛還下課最金魚賜獨偏  
他日史臣循吏傳可容誰在次公前

贈蔡生去疾

老覺朱絃倍可憐那能對爾不蟬連名從元禮門中得

酒愛知章水底眠物色要搜瀛海外風流須問建安前  
莫誇仙骨天台易不淺丹房四十年

丙戌元日試筆

條風吹臘媚初辰六十俄驚又一春總為書生心事足  
翻欣甲子厯頭新薦來椒酒顏從頽浴得桃湯鬢已銀  
不向青童覓如願豈煩朱紱挂吾身

李照者故徐方伯子與與僕之筆硯交也膺貢北  
上一詩贈之

襄南納節任居諸地下修文亦替除誰信青氈餘舊宿  
于今白首向公車垂鈎渭叟長嫌直結網唐家故不疎  
主府似憐三語掾橐裝無恙萬言書

壽華湖西翁八十

一屢身事五湖南八表淫書意更耽名向白衣無可妬  
詩如玄酒自言甘鞋輕不染塵中跡塵禿緣深物外談  
姓字可知西母刻見多清夢繞吾龔

武昌劉長卿先生見訪與談啖河魴鱠殘作

問余何事忽軒渠樂府劉生意氣餘垂老數行游俠傳  
居平一紙絕交書時清不救鯢生窘事往那論劍術疎  
偶為海王輸俊味對君猶憶武昌魚

送申比部還朝覲省侍

畫省仙郎上帝畿春風桃李有光輝過庭轉覺詩禮熟  
休汝翻矜冠蓋稀署裏白雲封隱几山中璧月媚初衣  
似聞麟閣諸名世容得桐江一釣磯

應城陳令自貴竹枉駕弇園小宴分韻得開字中

字

衡門春色日相催  
況是新知萬里來  
綠鬢向誰談拙宦  
青雲何處覓憐才  
航留錦里先生泛  
花待河陽令尹開  
縱有唾壺那用擊  
與君相對但銜杯

其二

春城忽爾下冥鴻  
把酒論心事未窮  
炙日暖將花共媚  
臨波影與石爭雄  
孤蹤汝托浮雲外  
百感吾殘返照中  
莫恨須臾便成別  
古來文苑幾人同



寄順天蹇中丞

清塵下馬捲朱旗正是呼韓款塞時烽火不驚刁斗色  
鐃歌偏寫越裳詩雅聞茂苑棠千樹行見漁陽麥兩岐  
任使胙茅酬大國不如調鼎贊無為

送林君自江南帥入領禁兵

白麻黃帝日相聞燕領虬鬚故不羣父老爭持都護綬  
君王借控羽林軍輕舟敵浪全須石大旆凌風半入雲  
見說匈奴先款塞可容麟閣畫元勲

劉介徵司農損書及新詩見示多哭仲氏國徵語  
却寄一章慰之

閩海繚虹縱復橫疇堪意氣比劉生第驚鮫室傳來淚  
多是鵠原痛後聲老覺斷金差有味病逢埋玉不勝情  
交游豈乏鍾期耳莫向人琴恨未平

再寄介徵司農時家弟已定交矣

漳江天盡尺書來茂苑人驚匹練開可是已經平子目  
誰能不惜孝標才冥鴻失序猶堪矯黃鳥遷喬且莫哀

他日單車追入洛遲君攜手闔閭臺

壽宜興吳詹簿六十

玉珂猶記倦登瀛無忝尚書舊履聲  
少日功名三語掾故人風味五侯鯖  
山餘瓊樹堪呼壽水入荆溪轉更清  
遙想畫堂文酒宴鶴能傳信鹿能迎

蘇子瞻學士初通判杭州過秀州遇鄉僧本覺菴  
文長老賦一詩留贈其後以學士再蒞杭過之  
則文已退院三過之圓寂矣皆有詩志其感慨

後四百年太守龔君勉於菴內別構丙舍祀蘇  
公顏之曰三過而悉步其韻一時諸賢和之不  
佞繼焉

五馬趨輝白髮中文殊已老尚呼童由來萬劫俱成幻  
何必三過始悟空此日使君真好事當時長者不言功  
若同圓澤論行徑只在錢唐東復東

其二

樹杪招提郭外村端明遺偈鎮山門高僧夏臘何煩計

前輩風流可重論  
謁罷只知詞客貴  
覺來真讓法王尊  
尚疑此話多人我  
何似翛然兩不言

其三

蓮社老僧隨幻去  
蓉城學士也難尋  
三毘尼地無生死  
一刹那間有古今  
不向空王拋世法  
却從初地寄鄉心  
法堂總自魏我在  
還有柴萁探淺深

再贈金山上人

鰲山今日道初成  
尤乞凡夫為證明  
信我浮杯無剩語

耐他彌勒有求名新書任作瑠雲色綺語如過黃鳥聲  
舉付丹霞燒像火儵然一鉢信心行

漁陽塞中丞走使惠餉謝之

春深一叟倦婆婆忽有材官鼓篋過始信鄭公移鎮後  
依然陶令酒錢多人從北斗占干莫天與南薰施薜蘿  
貧病愧無瓊玖報自呼如意按燕歌

徐茂吳司理解事之後三辱過存投贈新詩迫絕  
輩流汎瀾衆體逾自斐然庶幾不孤黃梅授衣

之托矣聊報四章以志區區

才脫青衫便自由五湖烟雨足漁舟居然隻字歸風雅  
別與微權傲勝流有酒可無桃葉妓移家須傍藕花洲  
長安達者應何限不為悲吟也白頭

其二

憐君落魄走詞壇白恰青鞵紫籜冠探得驪珠誰比價  
握將牛耳不論官流言似與湖山會失意翻驕天地寬  
莫怪老夫兒態發時時綺色到蒲團

其三

屈指歸田事事真可從時態怨沉淪天留歲月私黃卷  
我自春秋得素臣若下但寬賒酒處沃洲何待賣山人  
逢君且說弇中好莫遣梁間一榻塵

其四

江左諸徐不乏賢孤城接武廸功先還驚天上麒麟骨  
載觀洲前鸚鵡篇拙似君苗思毀硯老逢鍾子重留絃  
莫安漁父無人妬儘自能操物外權



助甫中丞解夏州節候次新蔡里中得二律寄之  
夏州城北赫連臺東望燕雲黯未開總為中丞初解節  
還因父老一傳杯金城鬱作千秋壯玉帳殊深萬族哀  
最是君王空拊髀可能偏借異時才

其二

解組歸來樂自餘胎簪桐栢繞君廬依然上蔡東門獵  
不害中山滿篋書萬事總輸文苑在百年難共酒人踈  
老夫丘壑差無恙好為相思一命車

送楊司理被徵

清白關西代不衰，風猷吳下去還思。  
生平自是無三惑，暮夜何煩有四知。  
明主自傳青瑣鑰，舉朝爭誦皂囊辭。  
莫談江漢垂綸叟，十載天容一壑私。

張將軍要余與沈令尹潘林曹三子駿兒同汎海  
時風日清美頗窮勝槩樂而賦之

天鷄喚白曉，雲和歷歷帆檣鏡裏過。  
羽扇徐揮散鸞鶴，石梁初解辨龜鼉。  
迴風疊鼓渾疑近，暎水橫旌轉覺多。

應有越裳來貢舶祇今猶自不揚波

其二

空青一片引牙樯不遣乾坤屬混茫風伯挽波迴碣石  
日君排霧上扶桑承平漸偃千烽色轉餉曾飛萬廩霜  
任使興公心境雜也應安坐聽鳴榔

月夜與張將軍及諸賢合飲海舶即事

暝色蒼然迥自開舵樓殊勝妙高臺燈如列宿黏空出  
樂似鈞天饗帝來忽捧驪珠霞潋灩乍驚鰲足水滢洄

老夫大有揮毫興欲嗣玄虛愧不才

其二

萬頃清光溢建牙孤城隱隱送悲笳真人自穩凌風葉  
使者頻窺貫月槎急下酒籌綠舞柘繁敲羯鼓為催花  
不須指點蓬萊境回首人間便可誇

卓漱甫光祿邀汪司馬及仲季諸社友大會西湖  
南屏選伎徵聲分韻賦詩伯玉以高字韻見寄  
俾余同作得二首

一時江左擅風騷，遂使湖山應接勞。  
花塢亂扶卿月上，簾門孤掩客星高。  
縱呼陶令愁難入，不學蘇生醉始逃。  
若問弇園佳勝事，翛然坐對一方袍。

其二

秋半南屏景更饒，六橋新水碧於醪。  
社中名勝推三雅，謂司馬仲季也湖上詩篇闕兩高。  
謂南北二峯客重王孫驕自得，操

成司馬興逾豪。非緣彥輔書生語，老去風流付爾曹。

為王光祿賦白鷺

不向殘陽逐倦鴉暫依新月隱梨花玉關霜被將軍領  
銀剪春裁浣女紗玄鳥色移新毫社烏衣名改舊王家  
令人轉憶昭靈閣曾覩瑤釵壓鬢斜

顧進士懋善令閩之甌寧

別酒吳江更一卮與君聊說宦遊奇七閩山翠偏誇勝  
十月林紅正弄姿渡憶驂鸞仙吏好山逢靈鷲宰官慈  
莫貪烟路鳬飛近且漫看雲度武夷

丙戌仲冬五日為余懸弧之辰與敬美弟及子孫

小飲得一七言近體

今年今月有虞世此日時生甫辰世間甲子粗已足  
歷尾支干仍換新詩書馥郁見三代骨肉都盧完十人  
莫愁玄冥鼓朔氣自許紅友招青春

丁亥元日即事

今歲元正大陰晦兒童寂寂收笑喧已無雲物媚清旦  
祇有雷電搖黃昏老慵不作畫鷄帖病廢何知白虎樽  
嗒然匡坐了吾事莫教剝啄驚柴門

題陳方伯玉叔天尺樓

高樓去天只一尺韋杜城南那許同倚檻星河翻下界  
捲簾閭闔吐剛風自憐王粲登臨嬾不怕陳登意氣雄  
爾道神仙好居此劉郎并幹委秋蓬

寄宗良國尉

江水粼粼無限聲接天風雨豫章城俱傳子政為親累  
不擬文休入弟評朱戶蓬蒿添傲色清齋橡栗助饑鳴  
蒲團欲擲人間世却為交遊感慨生



二月三十日清明又唐初晦節

二月已破三月新清明節晦來爭春堦前萸英落不惜  
陌上桃花嬌自親分無久住世間客何用悲他泉下人  
帑錢拭罷枯淚眼長有殘酒呼西鄰

沈同守過我山園要常廣文陸太學共集頗極登  
汎之樂沈以四咏見貽僅酬其二

海上三山未敢云滄浪一曲若為分座頭白恰狂司馬  
船尾青氈醉廣文驚網巨鱗時自閃坐林幽羽數相聞

莫疑桃李多生態總為春風屬使君

其二

老夫仍葺浣花莊判得山僧半日忙太學諸生誇並舫

江州刺史喜留觴

沈君携所醕  
淳醪續飲

藤蘿挾暝羣峰壯蘭芷

將風一水香誰為高樓題八詠只今猶是沈東陽

臨淮徹侯李君知六軍事賦此寄賀

將星今旦耀中階軋軋推輪出禁槐銀管細書穿月岫  
金吾奴隊擁天街異軍偏號蒼頭子別校多騎白鼻騮

見說朔方新氣色只今還是李臨淮

周進士移居賀之

周郎江左舊名流況逐烏衣諸從遊通籍已分金馬地  
移家金傍玉峰頭門前問字開三徑坐裏看山傲五侯  
最是後庭瓊樹好一枝仍報鄰家秋

弇州續稿卷十七

欽定四庫全書

弇州續稿卷十八

明 王世貞 撰

詩部

七言律

壽邢封君

甲子重開十六齡  
祥鸞為德鶴為形  
諸方衲子俱稱佛  
一邑嬰兒半姓邢  
雅有金緋歸視膳  
即看蘭玉盡充庭

試論南極稱籌者也是江湖老客星

送袁子年守青州蓋僕三十年宦游地也曾題詩  
刻石雲門山侍御毛君近為亭覆之

曾憶東方千騎尊羨君仍擁五熊旂城西澠水能為酒  
檻外雲山可作門避舍蓋公應自好觀風季子欲誰論  
如聞臺使登臨地洗石重拈舊墨痕

送石阡守陸

橫金被紫拜新除官好何妨萬里餘  
犵狁衣仍諱鬼

客取入饌解名魚石田雖瘠堪供賦齋閣長閒好著書  
却笑鬱林先太守虛將壓載累舟車

送撫浙溫司馬入佐大農

太真名輩許誰如況是追鋒有召車全越已收文種治  
大農能廢計然書皂囊膽落傳應久白屋神交意不踈  
欲買豚肩趨道左恐煩軒冕狎樵漁

張左虞都尉故與余善每過弇中風流謔浪飛白  
無算余猶以酒客鹵莽遇之後稍出其詩余稍

稍稱善然不覺其異也及集成而丐余為叙因  
賦諸友篇左虞僅居四十人之一耳去年左虞  
死余不能往弔以香帛寓之而無主喪者孟秋  
之朔偶攤書出曬於散帙中探得他詩讀之不  
甚快最後一卷極清新麗雅之致句字有力格  
韻不凡而忘其誰作以集考之則左虞製也不  
覺失聲而泣吾愧鍾子期多矣遂成一七言律  
而會其子授官奔喪歸并書諸友篇寄之俾焚



於棺所逝者有知將從夜臺沽酒三叫稱快余  
亦可以無憾藝林矣

都尉頻過白接羅酒酣時自覓鍾期雖成玄晏先生序  
未表邯鄲幼婦碑豈為兜鍪寬自狎還從鑿落誤深知  
今晨散帙初開眼大雅中興定不疑

陳僉憲文遂按節彭城故人子曹生上謁賦此寄  
之

八月漕河正穩流此時賓從在黃樓重扶十載乘驄色

與續千年戲馬游門為通家收北海客因長揖禮曹丘  
酒闌倘及江南事留得微星傍女牛

有所聞作

藥鑪經卷日從容愧殺微名溷九重豈為禁林需左馬  
偶然宗伯讓夔龍霜秋不耐芙蓉老雲色依然薜荔封  
自是五更眠更熟可曾聽到未央鐘

其二

聞道弓旌及隱淪可緣真遇愛龍人虛云展氏曾三黜

其那王尊僅一身首肯摠肥沙塞晚桃花無恙武陵春  
欲知元亮籃輿意畏踏丹陽郭裏塵

餞右伯對滄王公之浙藩於西潁劇思西湖之勝

因成二章送之

婁子城西楓乍肥使君軒蓋有光輝行從父老攀青雀  
坐引湖山入紫微兩地摠深吳會福一溪偏失杜陵依  
相思夜雪須乘興棹到錢塘未肯歸

其二

長公公事了西湖能勝于今右伯無車急即時烏慢榜  
壘乾隨處酒家胡人豪摠並推昭代物色應須問老夫  
好憶羣賢臨祖日牙璋萬隊出姑蘇

送陳郡丞履入為戶部郎君凡兩丞吾郡矣

上佐重輝澤國鄉中朝新拜地官郎逾深竹馬他年意  
不改銀魚舊日光奏計有人賢尹鐸采風何議難弘羊  
臨岐更拭垂枯眼為有問閭淚萬行

顧尚璽名世八十壽言公有二子美而文

肯學馮郎老漢曹蚤知陶監掛宮袍篋中旖旎餘雞舌  
池上叅差長鳳毛竒石數拳心並古清商一部興彌高  
閒來却笑非熊叟即使垂竿也自勞

過喻使君邦相郡齋與其尊大夫八十翁四孫及  
通家余子小飲有述

十年刺敝長清狂懸榻傳呼已下梁何忝朋車仍向呂  
別從文苑得龔黃筵中鳳有將雛曲膝下龍傳上客觴  
不為老夫踈筆札欲標高榜德星堂

喻太守邦相及陳丞李司理邀飲顧園作

初從窈窕轉深幽忽敞中天與目謀  
傑構時時撐碧落迴廊面面俯清流  
涵星淺藻催浮動入雨踈筠佐唱酬  
不道使君容阿敬豈應單為辟彊留

過大宗伯徐公作

舊標通德宛如斯屈指登堂十四期  
不為龍門孤轉峻自緣狐性老多疑  
談深忽出憂天語病久方知荷帝私  
試撚霜髭兩相問于今得似秣陵時

徐大宗伯歸有園留宴作

曲檻迴廊斷復連，疎花奇石巧相緣。  
橫穿屋裏千迷道，忽入壺中小有天。  
暎架青藜寬自讀，開尊白墮許吾傳。  
丈人門逕今粗曉，時擬扁舟問草玄。

潘方伯邀游豫園

豫園長日鎖宮堯，為我聊憇鳥雀驕。  
碧沼靜能涵象緯，朱甍高自割烟霄。  
嵯峨玉聳栖雲岫，宛轉銀題上漢橋。  
却笑閒居先散騎，枋榆三尺也逍遙。

顧尚靈伯仲東西二園今併為一然主人老病無  
不治矣信步一游志感

舊識何家山大小漸來併作一山深主人稱病掩關卧  
園子偷閒無處尋墮石將藤全失徑窺堦迸筍別成林  
亦知陵谷須更事徙倚能令百感侵

游潘顧諸園畢自題弇園

踏徧名園意未舒大都京洛貴人居穿錢作埽難調馬  
鏤石鋪池礙種魚似比幼輿輸一壑轉令元亮愛吾廬



興來呼得尖頭艇，餵蟻烹鱗信所如。

廣州朱提舉以歐楨白虞部書及詩至却寄

客星三載出姑蘇，翹首南雲思轉孤。忽爾羊城逢使者，  
頓然鮫浦至明珠。篇章意氣差強在，齒髮神明可係無。  
君道丹砂勾漏好，倘能分貺及凡夫。

過吳太學新園賞菊卜夜作

門外軒車若水流，能虛要地結清幽。連峯半隱嵯峨閣，  
闌高而山暗室中。穿窈窕溝銀燭，媚迴黃菊暝綠窗。驕  
小故云

借翠筠秋狂夫丙夜猶呼酒寄語陳遵轄慢投

虎丘西僧房晨訪曹茂來居士山閣小飲

竹逕通幽信短筇山樓忽敞得從容殘霜墮木青仍在  
旭日披雲紫漸濃香積總饒居士飯東林翻厭遠師鐘  
逢君更自寬拘束一盞雙螯喜殺儂

慧山東園為王光祿家物余再過之矣復以與此  
部曹安二山人曹王二太學一游即事有述

三過王園興轉新為貪幽景豈關人蒼苔印鹿尤堪賞

古樹啼鴉也不嗔自有真山當北戶任他流水入西鄰  
翻驕履道林中竹總好還沾京洛塵

華太學邀過鴻臚卿王公慧山西園景物尤勝麗  
與俞比部曹山人同賦

屐齒何妨細雨過主人緣客治巖阿朱樓有勢爭霄漢  
綺樹無心長薜蘿疊石巧當山色闕分泉別取水聲多  
編錢故是王家埽喚作侖中奈我何

疊前韻奉酬徐宗伯見和之作時公有書勸駕詩

尾亦及之

三見咸陽哭李斯一歸東海十成期  
毋論啓事人堪笑  
忽得除書已亦疑  
野性雲霄終自淺  
主恩天地欲誰私  
縱令伏櫪雄心在  
猶憶羊腸踈足時

疊前韻和徐宗伯歸有園見和之作

青樽小語夜留連  
重結金門隱吏緣  
密竹似調絃上雨  
踈萍欲點鏡中天  
功名鬼苑吾甘薄  
姓字鷄林爾任傳  
無那谷神新有解  
從知不愛子雲玄

公押玄字懸知歸  
有非真有直欲從

君叩牝玄  
之句故云

答汝寧張助甫中丞

歲晏崢嶸有鴈飛中原音信未全違  
青山快意無南北  
白首談兵有是非  
休汝不妨車騎簡  
過淮殊覺友朋稀  
莫疑江左除書下  
依舊菰蘆一布衣

三疊韻徐宗伯勸駕之作

老衰那敢信吾斯  
才拙寧須用可期  
蕭颺蛾眉應少妬  
囁嚅雞肋反堪疑  
命如侯白聊稱厚  
身學楊朱祇自私

卷十八  
聞道漢廷新禮樂知公不忍負清時

三疊韻和徐宗伯大士齋韻

輕世那能似魯連祇因貪結海山緣  
偶逢居士論初地却引私陀禮梵天  
白馬東來無法授青牛西去有經傳  
但教心境長如水不礙真如不礙玄

戊子元日試筆

嚴城爆竹鼓統統屈指新晨六十三  
小為祝釐違野服將無改跡戀朝簪  
羣兒椒酒雖全却小塢梅花或可探

時余以齋  
日戒飲

出處浮雲無定所肯容時趣入終南

同年韓令君百谷齊之諸賢邀餞幼于館分韻得

雲字

社中諸儁摠能文况復柴桑有隱君十載空林成獨往  
一宵清晤又離羣拈來小草誰偏愧賦得文無也愛聞  
稍喜吳門如練色不妨猶挂秣陵雲

徐叅議邀游東園有述

君是當年徐湛之一時風尚在園池輕籃出沒疑秦嶺

小艇迴沿似武夷漸入深崖青窈窕忽排連岫玉叅差  
不知處處梅花發羌管猶煩特地吹

咏徐園瀑布流觴處

得爾真成煉石才突從平地吐崔巍流觴恰自蘭亭出  
瀑布如分鴈蕩來片玉挂空搖旭日千珠感水沸春雷  
醉能醒我醒仍醉一坐須傾一百杯

奉要太宰袁公抑之過天界寺上人房時大司寇  
陸公與繩後至談讌梅花古松下作



隱囊紗帽對傳卮，宛似袁公步屣時。  
屋後梅花堪爾供，庭前柏子是吾師。  
從知矯鳳冥高漢，偶為將雛遶故枝。  
言向士衡詢往事，語來無那夕陽移。

王太僕公漢上之別垂十五年矣，讀公全集見寄  
見懷之詩凡十餘章而不盡達賦此謝之。貞之  
誕辰乃翁登第歲也。

北海風流一代賢，襄陽耆舊許誰先。  
揆余初度懸弧日，正爾公車射策年。  
敝刺姓名勞齒憶，空梁顏色借詩傳。

舊交垂盡鰥生老唯有靈光獨歸然

游靈谷寺

寶公靈骨未全隳寶地金書特護持塔從摠輸龍蛻處

錫飛寧復鶴驚時

初寶公與白鶴道人爭志栖止處公以錫道人以鶴鶴至其地欲下聞錫

驚而去公遂得之

琵琶街畔疑天鼓舍利輪中表物儀却恨貂

璫諸貴在不教披鮮讀殘碑

夜與諸公飲大雄殿前庭銀杏下得月有作

平楚蒼然暝未開暫依高樹共徘徊一珠陡自中天湧

萬象紛從下界來，微飢不妨呼米汁。  
晚叅何幸傍經臺，諸賢不置支公坐。  
寂默誰窺許掾才。

陳先輩以佳章見投報贈一律

南州一刺許登堂，白下于今是豫章。  
古調自來歸伯玉，高名當復比元方。  
家藏敝帚慚難薦，客有明珠喜欲狂。  
豈為西臺多列柏，看君字字挾風霜。

送太宰楊公考績北上

尚書舊績優三禮，太宰新銜冠六卿。  
此去物情推簡要，

向來公望在寅清都人跼臂迎車轍天子臨軒識履聲  
倘及鳳皇臺上色只今猶自暮雲橫

同羣公宴徐氏東園二首

君王舊賜青溪曲太傅長留綠野堂歷亂峯巒插雲漢  
縱橫卉木盡文章芳樽再展憐春色畫舫頻移媚夕陽  
不是羣公仙骨在蓬萊咫尺杳茫茫

其二

公子名園闢向東至今池館尚稱雄朱甍忽聳雲端驚

銀榜遙紫水面虹為許漁樵開辟逕且將絲管付松風  
信陵虛有夷門地指點蓬蒿說魏宮

過徐錦衣西園二首

主人如解子猷來三徑春風許暫開百種花名鬪金谷  
半空松勢壓徂徠飛觴倒入水壺影訪蹟徐披石鼓苔  
行到溪山漸窮處隔垣雲色隱高臺

園之後別有園  
鳳皇臺在焉

其二

丹崖軟草藉金鋪翠壁繁花帶綺疏忽覩漁舟穿薜荔

纔知魏闕有江湖  
枝頭鳥語聽仍失  
竹裏雲生看却無  
謾道侖中應更好  
老夫隨處且盧胡

飲魏公南園作

甲第芳園冠帝京  
上公高宴聚星卿  
球場地貴堪金埒  
幄榭花繁似錦城  
按舞別呈迴鶻隊  
吹簫俱作鳳皇聲  
莫將泉石輕為品  
曾覩先皇帶礪盟

同鄉諸君宴朱王孫同春園

朱邸王孫取次開  
鳳臺西去有歌臺  
池從漢苑天潢借

嶺載齊宮碣石來倦鳥似驚茵上舞殘花偏愛掌中杯  
不知懽極髭難醉翻恨城高暝易催

湯北部唐內翰邀同少司徒方公游徐公子萬竹  
園時主人以疾不見

莫嫌張廌解辭賓有例何曾問主人客比七賢差恨少  
侯同千畝未言貧琮琤別寫風中韻峭蒨平添雨後  
神但醉逃禪渾亦得已公蘭若是西鄰

趙司成邀同王光祿賞王貢士園芍藥前是已醉

牡丹下矣芍藥尤盛麗可愛賦此與之

四月王園醉牡丹仍逢芍藥擁朱欄  
毋論百種俱爭媚  
為殿羣芳且細看  
謔浪古時傳  
消水風流今日冠  
長干  
莫將傾國虛相讓  
誰似霓裳舞玉盤

端陽後一日薛鴻臚邀宗伯二司寇司農游武氏

園即事

偶值幽園字辟疆  
羣公多暇此傳觴  
蒲香可是餘端午  
竹色將無勝洛陽  
僧眼細分紅葉水  
小池通御溝水  
仙踪深掩



白雲鄉

有樓奉仙像甚秘

莫愁歸騎天街暝  
新月紛紛已過牆

雨中過姚氏故園與周公瑕張紉于唐東園戚不

磷分韻得春字時公瑕舊遊之地將五十年矣

但許清游不厭頻  
姚園雖故客懷新  
雨聲立散千家暑  
天意初迴萬井春  
別島過雲濃潑墨  
平溪颺水細生鱗  
沿堤大有金城樹  
總是周郎暗愴神

魏府三錦衣北園同方司徒宴游作

青山遠自鳳臺分

山石自鳳皇臺園移致者

窈窕逶迤迥不羣  
行處

蒼虬時一攫坐來黃鳥數相聞  
疏成曲沼因藏月別起  
高樓擬借雲若問主人何所似  
魏家公子信陵君

武定侯故邸竹園

碧陰如帶擁琅玕閣靜潭澄五月寒  
淇澳雨餘添峭蒨

夾池雲起助團欒前朝金穴恩猶在

謂翊公勛也

貴主妝樓

蹟已殘

先朝都尉鎮尚永嘉大長公主

見說侯家千畝賦可因郵使報

平安

諸公會趙中貴園

西華西去有園亭為客高樓日不局檻外四收吳苑綠  
杯中一送蔣山青溝從太液寬分潤席傍微垣好聚星  
莫笑貴人艱粉黛只今姚魏未全零

過故姚大名留飲有贈

十年襟尚一樽同剩有東山且付公茲日白門歸傲吏  
爾時青鬢試扶風歌殘伏櫪心猶在語到真乘境始空  
與君談釋  
門頗暢翻恨夙生餘習氣併將詞筆叩文通

大司馬陰公出扇索書近作汙蘭之後復得一律

博笑

尚書自是岷峨英四始究極八法精嘖然授以白團扇  
顧我要寫金陵行分無名筆嗣子敬可有秀句酬陰鏗  
尚有寵光置懷袖或使清風習習生

張幼于兄溥游金陵過從甚數忽爾告返聊成一  
章送之并寄長公伯起及韓令

愛汝名隱復名通片言能生四座風長干花月正眼底  
石湖雲樹來胸中鳥還久矣陶彭澤禽戲翛然張長公

我自東山幸無恙不教猿鶴許相同

徐二公子邀與陸司寇吳司空游東園

六月冰壺生晝涼侯家池館勝平陽樓頭霽色開鵲  
臺上新雲似鳳皇客託郇公厨味好人驚衛尉厨衣香  
不煩投轄深相挽小舫青油繫綠楊

王丈太僕得余前寄詩輒步五章見報敬疊奉謝

并懷賢從故侍御

冠蓋章華光昔賢郢中春雪敢爭先烏衣借我稱宗老

白首逢君作少年才大百篇翻更健名高一字也堪傳  
猶殘小阮前朝事說着那能不黯然

唐東園內翰遷吏部郎移舍過題園亭

新佐天官領百司可如供奉玉堂時向來仙骨應俱羨  
此去冰心祇自知衙散圖書周四壁亭虛花竹隱三垂  
墻頭一片鍾山色好是長吟謝朓詩

送林戶部敬夫出守雷州時敬夫以詩留別

花封上考旋浮沈粉署陪京更滯淫晚得郡符聊解擯

可從文苑覓知音三刀不獨方州夢十里還成到海吟  
莫向雷門疑布鼓遠臣今繫聖皇心

其二

五馬雖榮未足酬白門郎署少風流慚無啓事同新沓  
薄有詩篇答播州

謂薛道衡也

在宥摠偏雷電至不揚那為

海波愁貪泉便飲難移念廉石將從歷載留

壽內江鄧大夫弟為中丞公子為麻城令

五馬拋來步峽雲一珠收得媚江濱居依華萼知難弟

地有華萼山

宦有甘棠識使君懷縣綵衣遙似火鄧林瓊樹

盡千雲還將御史臺中柏釀得長春酒易醺

趙高郵來亨以詩寄懷并示新集有答

曼容甘薄猶存秩大阮雖歸別有官似爾早拋牛斗郡  
高郵為牛斗分半生長著鹿皮冠酒如彭澤時愁少家並匡廬

好關寒所幸知音晚途在朱絃流水不空彈

約周公瑕隱君湯沈二北部袁右軍陸山人齊王

孫游清涼寺阻雨不克登臺小飲方丈作



衝雨無繇叩上方一尊聊溷遠公房坐來薜荔將添潤  
齋罷茵陳尚送香未借文殊新色界從呼冠達古輪王  
清涼為文殊道場又云是梁武故苑諸賢蠟屐知無恙天眼應為取次償

哭弟後得李仲子能茂損書及古近體六章病甚

勉酬一律

傷心萬事一身孤名盡猶堪借子無任使暗投母按劍  
那能逆旅便酬珠將苞日彩終巢閣欲血霜啼好過都  
見說胡郎詩數就龍門咫尺在孤蘆

老瑞著詩數成李與同郡故云

贈袁履善長史同年

霜髯此日圍基叟綠髮當年同舍郎  
出僅一身何假鋪行逾千里不齎糧  
未論緇素皆親屬才得湖山即故鄉  
似爾蕭疎吾亦易檻猿籠鳥更茫茫

履善先生以二詩書扇見投報之

紈扇詩題字字新秋風一展一含顰  
少陵難字將輕過揚子方言未易論  
覓句祇應天外得知音誰解曲中真  
笑渠縱有天然色欲報寧無按劍人

送路大夫自司農部出守鞏昌

為裘舊識名家子，製錦俱推大國工。  
十載簿書秦主計，九秋旌節漢扶風。  
裴公湖上呼青雀，諸葛營頭度畫熊。  
但使卧思清淨理，何煩問道禮崆峒。

博羅張子孟竒通春秋，以文名嶺外久矣。  
今年秋將偕計北上，薄游南雍，出所業贄余，俄爾言別。  
挹注之情黯然對深時，趙少宰有二律送之，余亦次焉。

白門喧鵲勝啼鳥客有張卿美且都  
早日羅浮占紫氣爾時南海至明珠  
應徐欲盡吾真老籍湜能來意未孤  
不獨天人三策就春秋繁露似君無

其二

雞鳴山翠鬱嵯峨得一龍門便已多  
平子兩都仍賦草曲江千載更賢科  
春風拂坐堪余主秋水浮槎柰爾何  
若向翹材館中問掃廳丞相待誰過

吳三臯倩應試金陵以通家子來謁得見新文賦

慰賞之餘走筆為贈

車門一入通家刺遂有芳颺滿坐迴驥子汗從千里見  
鳳毛文自九霄來清標已足誇庭玉大賦真成辨楚材  
而父向衰吾已老却枝須傍兩家開

八月十六日携酒高坐寺同郭道人次父王山人  
承父孫山人齊之徐司理茂吳鄒學憲彥吉梅  
茂才禹金凡七人分韻余得南字

鷲宮高踞鳳城南半入杉松暝色酣杯底應徐無俗韻

坐中殷許有清談  
新蟾似尼嚴  
譙漏倦鳥疑催俗客驂  
蓮社故應饒野服  
竹林吾總愧朝簪

贈池州趙司理時君以棘事入都過訪

入門相見便呼奇  
大覺風標勝昔時  
才讀永州司馬記  
又吟楊部法曹詩

君見寄所撰池州郡園記已復示棘中倡和數十章

龍門目我

能無愧牛耳  
期君定不疑  
忽憶弇中何所似  
三春楊柳最青枝

丁休寧以棘事過金陵見枉有內子之戚思歸慰

留之

徹棘寒花久自黃  
留君小住亦無妨  
攄然葉縣能飛舄  
其若河陽有悼亡  
得句且寬身外事  
消憂為發酒中狂  
只今循吏兼文苑  
屈指何人與鴈行

送湯比部捧元正表入賀時青瑣十年矣

錦吹牙旌捧傳軒  
千官鵠立賀正元  
十年供奉銅龍署  
今日傳開白虎樽  
共羨使星人是法  
母輕秋省室曾溫  
知君蒿目多訐畫  
為借椒香奉至尊

登盧龍山在觀後云晉中宗所名

琳宮寂寂掩玄關  
列柏層層徑可攀  
似聞司馬江東日  
分得盧龍塞上山  
萬雉低昂朝旭後  
千林出沒午陰間  
欲問閱江樓記處  
露臺元自惜民艱

二劉宮庶宮洗主試南都并贈一章

恭承嘉命簡時髦  
水國聯翩宮錦袍  
並係秦龍劉累氏  
同為相馬九方臯  
三山劍色雙牛斗  
六代詞華一羽毛  
識得挽回淳古意  
不妨疏越為君操



金陵署中乞骸杜門辱孚如吏部寄詩有答

寒乞金陵老病身忽傳鄒律轉陽春句如古郢辭中雪  
名是西京賦裏人世眼也知尊白璧冰心知不染紅塵  
奕碁故作長安地萬事能令局局新

壽秀水陳君

君有子以侍御封  
君以九江守有傳

曾覩如綸施薜蘿  
勇冠鶴髮未蹉跎  
一驄聊為行春出  
五馬新從戲綵過  
餅嶺近知游屐易  
瀟湖寬問酒船多  
太丘庭院無多廣  
羔鴈紛紛奈爾何

陳先輩子卿大宗伯公子也美秀而文亡弟太常  
有拂拭之契訪我白下論詩契合尋上公車飲  
而贈之

一展新詩過所聞盡傾家釀為留君由來閩士思常袞  
只合陳家有長文毛自鳳池成五色汗從龍種失千羣  
他時太史占祥地可憶金陵日暮雲

步魏公西園小酌時公已捐館矣

魏國層臺挿絳霄西園飛蓋引和飈披崖競綴黃金粟

傍水爭抽白玉條  
春至管絃先鳥哢  
秋歸紅粉後花凋  
唯餘一掬羊曇淚  
併入風光賦大招

倪駕部船政為十世利太宰紀錄且有特命而僅  
守撫州於其行得二律勉之

戈船報政一時新  
上考書封迥絕倫  
僅將內史酬康樂

康樂為臨川內史即撫州也  
誰為東吳借寇恂  
吳守闕爭欲借君不得  
行部德

星母厭數勸農春雨不愁貧  
若語進賢應上賞于今魏

相許何人

其二

如雲五馬赴專城朱雀桁西多頌聲寧論漢省為郎薄  
祇覺山公啓事輕華蓋峯頭寬露冕清風閣上好題名

見說黃金賜循吏不須惆悵羨班生

君家若水餞  
班大理事



弇州續稿卷十八